

珂

雪

參

外

集

珂雪錄外集卷之八

公安鳬隱袁中道著

游居柿錄

萬曆癸丑正月初一日梅花廊花事盛開鹿胎
滿砌夜大雪時梅花中有鵲巢作二詩紀之
示祈年祈年亦和二首

九溪陳生君垣來極言九溪山水之勝至慈利
則兩山壁立中流一練宛如三峽光景春來

花艸芬香有若錦綺予將有灋陽之行卽欲乘便一遊君垣曰俟生歸作主人也

初四日晴明融雪予衡山之興勃勃午間肩輿至三穴橋登舟遊侶崔晦之時亦至盡工畫水龍未畢功漆工正施丹鉛窓櫺間夜與晦之篝燈閒話聽風水噴薄之聲眠甚適

天復微雨靜坐舟中顯宗寶方各遣其徒來送豆豉醬菜寶公書云知居士三十年後不少醬醯也予答云甚荷新年佛法

天飛雪已雪止舟人云春甲子雨則一春雨綿
綿幸而無雨步三穴橋邊大士菴菴基爲先
舅龔夾山地後施作菴施茶功德主卽八舅
龔靜亭也歲于三夏施茶不輟菴僧出緣疏
上有先兄中郎數字高僧如寄書之草草數
語集中未存稿然亦甚有致橋爲七省通衢
其中僅存橋石一梁有志欲脩之恐不能如
願也

天大霽家中送米人皆至午後舟畢工一室如

雪

初九日工匠皆去料理圖書筆研清坐擬以今日發舟而舟人曰舟忌七尤遂從俗不行天復雨橋水漫流午發舟風順掛帆行會已暮泊于大陽橋此屬大光里有大陽寺卽子美過公安時作詩與大陽長老者也

一帆走孟溪舟中閑向來所抄諸書清寂無事神情甚爽遣人于庄上取杉木數根呼木匠作一小亭于舟前蘭澤雲澤叔聞予至遣人

見訊

舟泊孟溪王吉人萬獻夫至萬獻夫者予蒙師
萬時徹先生子也時徹貧而教授讀書極博
亦能詩旁通天文地理卜筮五行之學予父
兄及弟侄皆從之學沒而有人夢爲社神于
此鄉者予作有傳

蘭澤叔以二騎相迎與晦之同往至珊瑚林下
馬閒步入荷葉山老樹漸盡至先居苔錢滿
地其左爲嚶鳴館愚兄弟三人少年脩業處

廢沼荒臺日以零落過鄰五叔雲澤舍拜于先塋今年覓數片碑石封識其間袁氏之興兩制科相承不滿二十年移居城市東徙西遷日不暇給何皇及先人烏兆也哉已同至四叔居午飧時久不饗見午日烘原野間快甚飯後携一勺步至三官冢高可憑望亦前代貴人馬鬣處也晚別去入舟

舟亭成兩叔移一尊舟中以舟泛至楊冶灣步岸上高阜處長安穀昇兩村之樹封天蔽日

日晡舟復還故處同步車臺湖邊追憶十年
前與兩叔縱飲水上一吸百盞如得霜鷹而
今少飲卽休豈非少壯異時喧恬殊樂也哉
此間無山有水至夏間則滿目皆水矣欲擇
一高阜處作一小亭避暑未暇也

辰起步至水神廟閒坐時河邊有麥地屬七宅
以征租急欲易數畝予意欲于水中築一別
業以爲終老計欣然許之且予性癖好舟居
此處多種楊柳維舟其下便是清涼國也

正月十六日舟往澧陽至四水口岸上多崇岡
遠水近林極爲幽邃此處原爲弭盜設二哨
今反爲行旅害法立弊生勢固然也過此始
多垂楊宿于觀音港

辰起夢中已聞槳聲初日抵津市矣息于關山
下與晦之同步山間草中頗有怪石水邊石
突兀有若浮梁者予跨之而坐其上有飛泉
淙淙下注四時不絕午飯後以舟至澧州過
彭觀山畔兩山夾立萬松鱗次中有山路泉

水出焉乍洪乍細可二里許欲至寧格觀日
已暮不果宿于宋家渡

辰起視宋家渡人家襟帶山水家家種槐柳茂
甚間有脩竹喬松頗似豪家別業雨稍止覓
篙工上二聖灘灘水急甚復以米募三四人
乃得上晚抵蘭江驛

雨稍止往謝謁大叅蔡公賜弔相見悲喜交集
言及慎軒先生不覺淚下蓋蔡公爲慎軒門
下士極相知愛且云近日黃先生令郎有書

來云去時甚自在又爲之喜別後止于紫極宮

移舟南門往紫極宮候蔡公枉顧赴蔡公招縱
譚三教異同之辨及經世出世之術予自念
日如銅鳥數年矣今得傾瀉亦一快也

登蘭江驛上樓樓名甚不佳予曰此可名爲國
香樓也至龔淳浦書室閱趙子昂書画淵明
遺跡每一幅書數語繪其事極得嬾漫瀟灑
之趣字贊亦佳

二十四日將取道鼎州走衡岳煙雨中發舟下
灘甚迅疾抵津市望彰觀山如画

雨中次嘉山江漸濶

從嘉山發風順掛帆若飛午後雨復大作止林
家渡登岸宿于林叟茅舍以無伴舟故也是
日舟中常見藥山

行十餘里抵麻河漁家數十戶櫛比時將過湖
舟人不熟湖路乃覓一舟二人爲導雨止成
行出七星窖至帽湖白水封天可二十里走

常德岸所爲侯家港也入小河夜宿不知何處是日舟中常見梁山

雨復作至流花口出鴨州大江天霽泊于牛鼻灘

灘

天色晴明新歲將一月矣始見開霽岸上菜花如黃雪午抵德山登山流水涓涓李花盛開至寺中有老宿聞予姓名來相導息于青蓮館緣寺右掖穿竹中至山後楚望閣往年遊此閣尚未建今巋然矣峙德山之足梁山當

其前郡城萬家如在窻櫺下時山下有小河
名釣灣可維舟命舟人移舟來夜宿舟中
由祖師堂上孤峯頂藉草而坐下臺穿竹中清
泉冷然至青蓮館寺僧皆有齋事復以棕團
至竹中假寐三桂子前方脩蘭若中郎遊此
舊有此志予睹之淒然午往楚望閣飯尋小
徑往德山塔庵復得一泉田間步溪松嶺上
至菴禮塔從寺路歸舟

入城問君超長君孝威病登君超之堂見其熟

用諸僕相視泫然孝威病尚未痊

二月初三日覓得一舟導往衡山午楊西來偕
一道人來送雨大作遂宿于舟

鳬舟至德山時楊脩齡按浙已行予以衰經未
往晤其長公制科文弱遣人以字相邀且云
李長叔兄亦在此急來一晤以水部有事于
榮藩故也時道途荒落甚憂梗塞西來勸之
甚力云衡山之行必俟秋稔乃妥予乃諾文
弱以來與西來別去至文弱江樓下文弱侍

其祖可亭公已先至頃之長叔亦至萬曆辛卯之秋予與長叔同失意阻風漢川一民舍譚笑彌日別去絕不相問于今二十三年矣長叔相見道故相與嘆時光迅速會合之難如此長叔曰當晚泊相聚時正暮秋風雨淒淒兄時語同行諸公及予曰此處寒鴉數點流水孤村景物亦何嘗不佳特吾輩懷抱自作苦耳兄猶記否予曰忘之矣是日飲江樓隔岸桃花千萬樹盛開晤言至子夜而散予

宿于舟

文弱邀看隔江堯花同行者爲長叔及諸公至
梁王廟卽梁松也香火甚盛予語文弱曰甚
矣鴻人之恕也于義帝則哭之于梁松則祠
之于李陵則清而爲亭以表揚之甚矣鴻人
之恕也文弱莞然是日步桃柳中昨日隔江
所見之花今得親以酒酌之矣新月初出飲
于沙上按鴻州以哭義帝甚哀故名義陵陽
山上有梁松祠又李陵作令于此今有清陵

館

遊德山時榮藩新阡在德山長叔往定賜地界
夜來相邀同往移舟清平明則長叔已先往
矣至德山憩于塔菴飯于左掖深竹中穿殿
西飲于三桂樹前老樹下敷蒲根上午登孤
峯晚從楚望閣下登舟時長叔竟以公冗不
及一面也

同文弱至江樓野原閒步晚長叔官舟亦至同
作桃源游

辰發舟至河流山卽武山也登岸上山顛小憩
下山過卓刀泉崔婆井坐江邊大石上以水
試茶尤佳登舟風帆走延溪渡夜治一勺與
長叔文弱諸公劇譚是日于文弱處見岳蒙
泉山水蒙泉名正字季方燕人天順中大拜
爲西涯相公外甥其画筆法古勁妙出筆墨
蹊逕之外西涯有七言長歌題其後

辰抵堯源泊舟學宮前望見綠蘿山長叔文弱
皆色飛江伯通來邀飲邑人士張阿蒙諸公

皆集遂同飲至子夜而散是日閱文通所藏書畫有錢舜舉貢獒圖梅花道人竹十餘幅每幅系以詩二句或數語極得瀟灑之趣後又有橡林款蓋道人常自稱爲橡林老書生也予昂行書渼陂行卷皆精絕

往遊桃源長叔官舟濡滯予坐文弱舟中候之見案上舊碑刻其一爲漢曹完德政碑靈帝中平二年造無書人姓名漢制多如此其中有云縣以河平元年遭白茆谷水灾害退于

戊亥之間興造城郭是後舊姓及脩身之士
官位不登君乃閔縉紳之徒不濟開南寺門
承望華岳嚮明而治卒使學者李儒欒規程
寅等各獲人爵之報予謂文弱曰可驗堪輿
之說自漢時已大行矣此碑在郃陽縣又有
華岳碑後云萬紐于瑾造此文南陽趙文淵
字德本奉勅書亦異制也是宇文周時物又
有周匡穆墓碑是北魏物後依稀有呂顯齊
澄等人名俟考俄長叔舟已至乃同行過綠

蘿山下諸峯纍纍極爲秀媚至白馬雪濤處
上有怪石登舟皆踞坐泊舟水溪與諸公步
入花源至桃花洞口桃可千餘樹夾道如錦
幄花蕊藉地寸餘至山竇有亭可坐泉從上
落滙于小池其上遂不可攀其右爲大士門
走桃花觀有桃川佳致四字勒石上書劉禹
錫題趙汝泉書馳道亦整潔間有杉松張阿
蒙諸公携榼宮中帶得弋陽梨園一部佐酒
予曰今年天常雨新歲尚未數見月至今日

始得此圓滿清光乃舍月不看而對此昏暗
燈燭舍數千樹桃花下不飲而住此欹側破
屋舍清泉不聽而聽此下里惡聲亦甚非計
酒間予乃竊步馳道間至桃花下月色轉朗
耀花香薰人藉地而坐頃之文弱亦至相顧
大咷曰已較遲八刻矣布地取茗歡笑移時
諸客亦有至者乃復登大士閣月下千山皆
如煙霧夜已深尋故路出水溪長叔已先至
舟意倦游不欲前趣歸遂悽然有別意因云

明日辰發恐不及作別遂從岸頭分袂各歸舟張阿蒙諸公及伯通皆先後歸邑去

從鈔遷村與文弱景明仲韜晦之進發方舟過澄溪至仙蛻石共據之而坐登舟里許爲漁仙寺徘徊伏波避暑洞中登山顛見諸峯疊疊有迴波日已晡尋故路歸舟萬山如蓮縈繞水光浩白月色皎潔乃共坐舟頭小飲沾醉而臥

從漁仙寺早發望見穿石亭立水上登其中如

坐鏡內近新湘溪山勢廻合過仙人巖不及
上至水西崖已暮其古色照人正與予所見
高安鹿苑等泊舟巖下已登其顛見山巒益
飛舞歸坐石板上小飲

與文弱放舟入怡望溪溪口卽有磊磊石壁老
樹茂竹便娟媚人可二里許巖溪相依若戀
戀不捨者至十餘曲後水石間出石爲水所
蝕若龜魚仰面昂首出沒水間灘聲雷轟霏
珠濺雪小舟復不可去乃步石壁下過溪水

浸巖處則跣而過凡三四渡有灘如酒雪相
與濯足望前溪叢樹中有小亭漁人曰此龍
角亭也下有龍湫急往改衣少息偶有鄉民
陳姓者以雞黍至感其意爲之飽訊溪所止
則云兩山相合中縈一帶可一百里許予曰
此真避秦處也恨無小舟不能窮其源耳相
與步歸至舟日向午遂理歸棹一瞬數十里
去花源一牛鳴宿焉

早抵桃源縣還諸公拜至伯通園中看花紫薇

二株紅酣池上齋頭有倪雲林山水一幅瀟
然清遠上系以親筆詩秋暑多病渴征夫怨
行路瑟瑟幽磽松清陰滿庭戶寒泉留崖石
白雲集朝暮懷哉如金玉周子美無度息景
以消搖無言思與晤遜學親丈秋暑辭親將
事于役因寫幽磽寒松并題五言以贈亦若
招隱之意云耳七月十八日倪瓈詩字皆不
俗可寶也又黃鶴山樵一幅皆真跡客有苦
苦勸予飲者不知予之非昔酒人也本無量

人苦勸飲本不善書人苦索字索字勉強塗抹聊以塞責可耳若多飲則有性命之憂可以性命殉人哉苦勸苦辭甚費分疏今後遠遊決不可入城邑聚落戒之入暮別諸公登舟乘微月聞文弱舟在呂真渡往覓之舟人畏魚梁不敢前隨一辰州舟行謬意予舟爲盜欲以弓弩射舟予大笑因泊于野去呂真渡十里中夜風雨大作

阻雨桃源郊外雨稍止予步至岸上覓一村舍

少住見一老叟坐織笠子因請客坐少間子
婦供薑茶予見叟意甚閒適時作歌聲因問
之曰爾耕田爲業乎抑漁人也叟曰有兒子
三人皆能耕田暇則取魚予問曰爾憂貧否
曰一日能了一日不憂貧也舟中以酒來命
叟同飲辭不能強與之一杯卽持以入室遺
其嫗復出縛笠不顧予私自念曰安得如此
老人也因與市一笠歸舟午後風止覓文弱
舟于鄒溪時文弱舟爲風所飄幾壞覓騎至

吼溪至時與予舟適同飯于其族人樓上予
問文弱曰此地何緣名爲鄒溪豈多鄒姓者
乎文弱曰五代史雷滿爲吼溪人字作吼非
鄒也

舟中候文弱未至予登岸着笠子持杖走黃菜
田間侍兒以蒲團來遂臥江上忽得詩二首
緣溪皆枸杞苗舟中人皆散去採掇以供午
飧午後發舟遊靈巖此後雖無崇山峻嶺而
竹樹檀欒溪巖廻合槩多隱者之居夜宿白

陽渡

從白陽渡發舟午過鎮龍觀觀在山頂喬松萬
餘株其下石巖頗巉蝕時出泉下有龍湫皆
上沸文弱有故人在山上館因登山少飲後
登舟近花巖見巖上石花爛斑乃悉花巖所
由名時大舟不得上灘乃覓小舟至蒼崖宿
焉

辰從花巖與文弱各以小舟行午抵蘇溪以山
上有蘇子卿廟故名文弱曰子卿何緣至此

乃有廟耶予曰應是李陵令臨沅時予卿來作遊客耳文弱大笑舍舟陸行文弱從人家乞馬予亦不能待一飯卽着笠子拄杖遡小溪行溪卽靈巖洞中所出水也景明仲韜晦之偕來行五里息于老樹下近巖數里見山峯波濤秀媚特甚至寺泉聲益厲予不暇入寺先之洞見洞中冷然石雲排當怒立卽欣然一笑曰不虛此來矣溪洞中有溪澗不可測其上常有雨點下滴若融雪響僧云新洞

亦去此不遠蓋數年間偶崩出一石門往瞰之更大于此其石理亦相類特昏黑須火炬而入炬旣而還洞口石搖搖欲墜殊可怖其右卽爲桃花洞一洞皆水惟亂石錯立水上可步往其中有門水從門中出予曰桃花洞口名不虛也過此水竇卽避秦人矣晚復步至前洞見石竇中一小碑上額篆唐朝奉題靈巖字其詩云一水穿巖走白沙巖頭樅木臥龍蛇分明便是桃源洞不見溪中流落花

後書政和八年某月郡倅零陵唐績游靈巖
後有字一行不可讀又壁上石刻元豐庚申
五月唐奎文叔蔣某似至字微來游又石上
刻詩云一條流水出巖前前洞沉沉後洞連
可惜秦人不能到獨教名跡著桃川考志有
宋通判唐績而無唐奎等姓名然志將唐績
詩作洛浦禪師又不知何據也統俟考予謂
靈巖外貌極朴茂而其中包藏靈怪正如一
樸茂人胷中含裹無窮麗藻耳

辰候馬不至卽持杖步至蘇溪道中語晦之日
吾已誓作山澤遊人以畢此生有佳處隔二
三十里者若必待輿馬以往則有待之煩大
矣不若與同侶緩步遇佳樹流泉則欣然而
坐予昨日走十五里全無倦意予其與膏梁
漸遠乎頃之至蘇溪復登大舟文弱以小舟
先歸水漸乾予舟數膠夜宿白羊渡上有烏
椿樹數百圍

過隙溪天復雨猛風怒雷大作泊河洑舟震蕩

甚持襍宿于關廟逢衡山行脚僧問衡山事
僧曰春來多霧咫尺不見人八九月遊爲妙
雨止移舟十餘里風逆甚予從一奚閒步岸上
柳陌花畦信步不覺十餘里已抵青泥灣上
息于小廟中日暮舟亦至泊槐花堤

辰起雨淋漓不可登岸以字別楊封公并與文
弱訂游衡之期遂泊舟老鶴堤市薪米作歸
計午後楊西來偕楊道人性寓以酒榼來送
日暮步溪柳間

雨至文弱處閱所集舊碑頗有目所未經見者
有萬年宮銘及李英公墓碑是唐高宗書無
一筆不似聖教序鄭州寺碑隋大業二年鄭
州刺史李淵爲男世民造蓋世民有恙造以
祈福者也景龍鍾銘上有飛白字唐睿宗景
雲二年造卽于鍾中搨出者雲麾將軍碑李
北海書中有將軍名思訓語似卽是大李將
軍僧夢英篆偏旁字源後有郭忠恕札跡頗
奇謫又廩開府步虛詞草書上悵刻謝靈運

不知開府梁人也鄭萬鈞心經世謂逸少者
非唐秦王法門寺碑世誤以爲太宗不知是
後唐李亞子也其中有文皇則天語可知又
王嗣忠碑元載撰文王縉書在渭南王縉不
以書名而字跡極遒媚元載文字亦不多見
匆匆未暇錄出其餘多經見者故不著

雨大作泊釣灣鷺絲船已至予去年八月從玉
泉回沮漳舟中望高安諸山如画因作一匾
舟可涉灘者欲不計歲月窮覽諸山之勝後

以家冗見奪此舟亦寘之大江往來然山船
空在山溪又值屢渡水涸不得入村落乃從
洞庭轉歸自殘臘至今了無消息嗟乎予于
世有何所希止以此一扁舟作山水緣圖一
蘆蒼蓼岸看夕陽朝霞之樂而已矣幸而已
至爲之歎呼久之

稍霽發舟至牛鼻灘鬻絲舟同過

天微霽過湖湖中風雨大作泊七星窖

舟次洞庭湖天霽風色不正移舟掘子窖起步

立芳艸中偶有人持刺相晤乃桃源李茂才
名時通李源埜方伯名徵孫也出方伯玄光
草示予見其諸什清妥不俗惜其名字不著
桃源凡六十年一人成進士前壬辰爲某次
壬辰爲公後壬辰卽江淥蘿名盈科也別去
舟人向予指曰此爲梁山此爲藥山梁山有
鋒刃而藥山坦迤秀邃二山皆經由未陟頗
增懷想

夜風息星光照水可辨原隰遂鼓棹過白頭湖

湖中來去舟如織行十餘里入日日上抵麻
河櫛後立舟頭見綠草封天因憶古人芳草
萋萋王孫不歸之句已辭梁山看藥山了了
從麻河至會口一路頗多古樹蓋來時柳線
初垂至是鬱然茂盛時有人家濃陰覆屋白
水照門晦之日夢溪新墾得如此樹爲准予
笑曰吾鬚日以白則吾庄之樹日以綠矣晦
之撫掌兩岸多如赤霞黃花菜菔原野濃香
撲鼻與晦之坐蓬席間不覺馳求都盡近會

口已見彰觀及嘉山舟人取捷路轉安鄉焦
溪回匆匆與山靈爲別又不知何日坐崖石
聽松濤也近一箭河水如竹箭流然狹而曲
黃山忽左忽右如迷藏泊于野渡去焦溪十

餘里

早至孟溪新市湖邊地築臺已成不及會諸叔
風順一帆走三橋歸簷簷谷

天大風雨泥濘中以輿夫歸縣是日始聞中郎
沙市居已市與人世間無不易主之宅第然

或百年或數十年未有如茲之迅速者也感念不覺淚下

歸園中所移紅梅及絳桃俱已活槐亦兔目矣
三月初八日從小河出扁渡往游太和

發舟午至官庄此後頗多垂楊至扁渡卽古所謂兩岸綠楊遮虎渡也地多水空種楊柳他樹不植也渡江逆風行濤聲頗可怖十里之內關禁疊出予久欲作憎大江文矣今益信也

坐金栗園時將有玄岳之游晦之往草市覓舟
已得一便舟可徑送至均州約以十八日行
住金栗園高守中王天根偕黃純如名存仁至
純如祖名大韶號恪湖爲袁榮襄公妻侄榮
襄爲興府長史大韶爲引禮生從龍陞序班
出爲富順脩武仁化縣尹黃有僕黃廣妻菊
花世廟曾召入日我在興都虧汝二人伏侍
因賞之

十九日舟中忽見死心至時傳死心示寂久矣

見之大駭死心亦云數年間傳兄已死予于
菴中立一牌位夜入夢大有驗復相與大笑
同夏道甫黃竹實往菩提寺看死心寺左有小
書舍極清致茂林陰翳竹實出中郎詩一卷
乃庚戌七夕諸作皆絕筆也乞予書數字卷
首予爲書中郎遺墨四字

二十一日從草市發舟游太和過太白湖夜宿
龍口風大作黑雲四起岸上有道人唱道曲
晚泊者皆來聽亦微有致

舟泊龍口風不止湖中雪浪掀舞不得渡清坐
舟中行忙不及携書笈來惟端居念清泰也
雞鳴後風稍息渡長湖舟欹側甚時張瑤嘴小
河新爲居民築斷後取道三湖湖中多茭葦
時時有數里荷葉遇田婦持茭白歸者以米
易之煮來作午飧甘香異常有小兒持小免
嬉戲乃以扇易之放生晚過張瑤嘴此後垂
楊夾路麥浪盈疇居民門外時繫小舟
逆風復作午出夜又口走襄河予從此道順流

走武昌凡十餘次甲辰下第從襄陽至草市竟以風逆止于沙陽陸行此水皆生平所未經也

風逆甚移舟十餘里泊于野渡鄰舟數十鱗集天色晴明午間有二小舟載眷屬他徙觸巨舟而覆予舟中倉忙救得一男子一婦人餘二婦抱二稚俱入洪流不見濶可哀愍旣已無可奈何爲之掩泣而去晚抵多寶灣水勢甚疾夜宿聞風雨聲覘之乃水漲聲也

早行二十餘里至沙陽市薪米甲辰從此陸行
走江陵今十餘年矣此路麥豆頗豐饒去年
大水兩岸決口多未脩襄水忽漲復從舊路
漫衍至春口鎮水復泛景陵諸處蕩然一壑
夜宿馬良山下此日始見承天諸山十餘日
內滿目皆洪濤今日始見山色稍覺爽豁

從馬良山下發舟風雨不止晚泊一小港中兩
岸垂楊山色頗佳會前舟有行者復登舟去
鍾祥三十餘里野泊

有便路通江遂不取郡道舟中惟見綠樹內黃
屋隱隱卽陵寢也晚泊金花灘從廿一日發
舟今九日矣日日逆風苦雨且遭襄水大發
牽路皆絕平生以煙波爲樂到此殊覺行路
之難以後荆郡遊太和者決空陸去水歸爲
便

南風大作舟以過灘壞施整理後始成行山色
甚佳午過豐樂河夜宿龍王洲此後灘水逾
疾牽纜者皆憊乃以輕裝從陸遂宿旅舍

從龍王洲陸行與晦之跨蹇行麥浪中甚快時
有楊柳濃陰過宋玉墓飯于空城夜宿潼口
望襄中諸山疊疊偶有山輜遂募之行

過襄陽觀音閣登水邊亭漢水怒吼對岸卽走
鹿門道也亭後有石潭石理亦奇古大類廊
丘劔池不數里卽爲習家池憶與中郎同飲
于此光景不覺泫然近郭爲羊叔子王叔和
祠昔年塵土中瞥然一過皆未之見也憩于
城北關廟偶當陽李生伏之客此聞予來同

其友人余玉淵貴竹楊華寓至寓二君亦將有太和之行遂相約同往

辰渡漢水來道木香花撲鼻至柿子舗一村皆柿山色自襄中起一路蜿蜒層疊漢水明于雪晚宿柴店遠山漸近

自柴店渡江過穀城縣不復見江穿萬山中溪流汨汨晚過萬佛巖巖面清溪鑿石爲屋三間有老僧居焉宿于咎家舗

過千佛巖穿萬山中十步一渡過界山絕頂彷

佛見天柱峯龍章鳳質令人肅然起敬午抵
草店訊漢陽友人王石洋消息尚在楚府茶
菴急遣使相聞石洋聞予至亦遣使見迎遂
往茶菴相晤一見悲喜交集夜談至子夜始
寐石洋携二嗣并何抑之茂才讀書此中已
半年矣

欲登山以倦甚暫止會石洋以浴佛日有少齋
事約以初九日始登山過周藩茶菴危樓画
閣綺錯幕布

浴佛日禮佛齋戒步至迎恩宮橋上青石界道
欄杆整麗下有洪流卽所云石板灘也橋畔
望天柱峯如離雲琢霧

四月初九日晨起登山出楚府庵過謝家橋經
草店松杉夾路菴觀櫛比朱戶隱見至冲虛
菴上仙關過玉真宮玄岳門元和觀廻龍觀
老君關公廟太子坡至平臺下十八盤聽水
卽龍泉觀遡九渡澗奔雷轉石吼怒交擊凡
三十里抵玉虛巖過中瓊臺息于上瓊臺後

爲瓊臺峰若髻前指陳希夷脩道處也

初十日從瓊臺登天柱峯謁帝下界獻兜羅綿
雲有若銀海謁帝後下天明路旁道院鱗次
皆不及入至南巖巖石若駁雲殿後依巖爲
諸院宇若脩廊行至聖父母殿前望天柱若
几案前息于棋亭步至捨身巖杉松滿路皆
數十圍宿于張羽士樓上有游記故畧

十一日天霽早復至南巖宮後石巖下看山遂
行過雷洞至太子巖石亦奇峭有水淙淙下

滴杉松皆數木圍下至紫霄宮宮後卽展旗
峯前有池泓然沉碧有水亭可憩仍至九渡
澗抵平臺下十八盤雨大作覓舊路歸草店
寓

十四日天霽作玉虛五龍之游從草店至元和
觀折而東過大石橋卽九渡澗及諸澗下流
也至玉虛宮不及入乘霽走九龍四十餘里
至行宮過仁威觀流水轟然過磨針澗抵五
龍宮至自然庵長生巖也

十五日尋舊路歸始入玉虛宮息于望仙樓宛
同宸居周遭類一大縣出宮數里章甫諸公
擔酒榼來迎飲數杯歸茶庵熟寐

開霽同章甫至均州石路甚整遊于淨樂宮憩
紫雲亭

渡汚黃廣文邀遊滄浪亭卽孺子歌處也頗有
怪石流水噙其下至觀音閣望遠近山色如
畫

別章甫登舟水如竹箭流穿萬山中宿于光化

逆風大作近襄中與晦之自柿子舖肩輿至樊城渡江住北城關廟

登昭明文選樓晤孝廉王繡林便飯于其宅始知龍君御已過此

王孫雍南邀遊會仙樓樓卽王孫父所建以奉純陽祖師者也六七十年前有老人久僵遇一丈人于路令扶杖強起遂伸其人拜謝之訊其姓名曰我回道人也忽不見僅存其杖今嚴事之

天暑甚從者皆病城中疫疾大作度不可久留
乃束裝去繡林諸公餞于觀音閣飯于潼口

晚宿空城

從空城曉發晚宿麗陽步石橋邊聽泉
宿建陽驛偶步至古廟有儒生爲驛官館師寓
焉因留酌

五月初四日早抵沙市金粟園

登汎龜舟避暑柳下得雲浦晉中書

避暑舟中脩園後籬落

舟中得龍君御書并弔儀及哭中郎詩自初日
爲始金粟菴前有流水名三義河垂楊交樾
可十里予以汎鳬舟繫柳下水風拂面陰陰
肅肅有載酒問奇者予亦不爲峻拒予年已
近五旬世間樂事盡讓人矣獨閒適一種光
景聊以耗磨壯心遣餘年知我罪我聽之而
已

六月初一日居公安篔簾谷江水大漲舟至艾
家堰堤畔楊柳中可泛

移居沙市以舟載米至得湘潭周伯孔書以所
作花雪賦乞序

得楊文弱書知其靜息江樓輶遊山之興寄有
桃源山水記二冊乞予遊太和記

從金粟閣登舟入村午渡江過扁渡宿于官庄
從官庄發舟一帆細雨午抵長安村泊于孟家
溪見所築臺亭亭水上

蘭澤雲澤叔來舟中泛于輞湖步月至郭家棚
前大堰採芡實飲于大堤

再泛輞河步月至郭家棚前大堰採芡實飲于
大堤

杜庄竹樹日益茂陰濃無暑舟往公安園中拆
一空亭寘之

續太和未成詩編次其曆尚覺此遊草草姑留
以待再至也

至杜園看立亭亭在松櫟之中

雲澤叔邀看桂蒼是年桂開較遲獨此二樹開
早而更茂盛蓋予叔祖松峯公少從予外祖

方伯龔公春所學其地爲家塾此樹皆方伯
公所手植也亦七十餘年矣

舟從黃金口次公安劉橋

至沙市園桂花盛開入門微作寒熱大類瘡狀
瘡作且吐晚明月如晝桂香滿院不能賞也

中秋病瘡發則吐吐急出血熱不可支得無跡

廬山書極言廬山之勝邀予來遊

病瘡嘔帶血熱如故蔡元禮大參以候按臺至
荆遣吏致書并分俸且以所遊太和記見示

病甚不能晤

火熾甚午間瘧復至熱不能堪求死不得入暮乘月以舟歸公安

表弟龔滄嶼新制科回得丘長孺書時已陞遼東遊擊將軍書中極言地方之不善得光祿卿李道宇書約予南游是日瘧不至快甚

西園有橘子四樹大皆合抱開花香極清結實甘美異常乃架一室于其間孟浩然所云君子耀霜橘乃實境也取橘中叟所云樂不減

商山意因名之曰橘樂堂云

體中已平辰出見木穉花已落蕊芭蕉漸拆紫
薇花猶有一二枝開者復入靜坐

王遺狂表弟從南中歸備問南中近日事體因
留之午食時新脩橘樂堂垂成閒步徃視之
風日清美時步至橘樂堂看橘子垂垂取案頭
本草速目鎮日無人至殊清寂也

怡山來論學問不遇人終不得自在予曰所謂
客塵步步隨人轉有大威光不能現是也六

侄自郢中來得黃州王勁之書并寄詩刻乞
予作序

清坐于閑時聞王以明別駕已乞休歸住沙市
辰飯後過述之侄宅與述之同視王尚甫瘡時
尚未愈自言苦極僅存一縷命耳午至五弟
宅五弟瘡亦未愈留午飧歸倦眠補山遊未
成詩數首

天晴霽遣人至金粟園移行裝歸家病後不堪
勞頓尚需調理未能遠出故也

怡山曰宗門中不言脩行予曰宗門中說脩行
便是點染況不脩行乎

王以明居士從秦中歸來園清話

蔡元履先生由大叅轉本省廉憲取道至省予
以病遣人致書并黃學士詩及予叅遊日曆
重九日體中未康輒登高之會蔡元履先生以
書來末云出山後乃聞瓊臺一道之勝恨未
極自然南巖至五龍三十里幽雅絕塵蠟屐
亦似未探也蓋予從南巖歸山下復走五龍

故懼此三十里之緣耳明年當再往以了此願也

始閱襍華病後慵懶隨意取一冊濡染法味耳石首王近臣來晤聞求如王孝廉不祿消息甚爲感嘆求知名啟遵中丁酉鄉試得年僅四十無兒近臣云求如數年前嘗與人言若五行之理審有者我四十必不得過今果然王以明過園譚及中郎事相視而泣

早得貴州督學高淳韓璧哉書韓公以戶部榷

關時曾會于潯陽近以督學任滿移官他省
過此覓予于公安不得覓予于沙頭亦不得
乃遣人以書至大約悼念中郎而嗟予之久
不第也

得湯太史消息春夏候予于家不至不知予之
以病不出也然春夏間有傳湯爲已逝者今
得此信甚喜寄詩有云楚中才子蕭條甚乞
與人間留小脩

得王章甫書已從楚府茶菴移至樊城仁皇寺

矣今冬尚不歸明春當往廬阜約予同住又得雲浦書初中郎移居沙市予與之不能旦夕離亦市一園于沙市之觀音寺畔粗有花木池臺中郎見亦樂之意謂了當世緣不數年間兄弟聚首此地决不效蘇家兄弟陽羨許下事也不幸中郎溘爾去世予亦無心復居沙市數年前已欲市與雲浦蓋我正食貧不能留之雲浦欲以俸薪市去作一庵請一二高僧住止其中且可爲吾輩往來聚首計

會雲浦以按晉去昨歸托寶公致此意雲浦
欣然諾之末云惟券書一券異日刻之日記
中亦一種新話也王章甫書來云襄寢有承
恩寺去郡九十里清流曲曲在堆藍疊翠之
中似是山水尤物米元章直以爲過會稽山
遊興如火熾且姑忍耐待兄來同往又有書
相勸節嗇莫作詩文予自思年來日瘦日老
不關詩文也自亡兄中郎去後寂寞寡驩正
坐此耳又得京山王孝廉穉恭寄祈年書大

畧云庚戌長安歸一病幾殆稍有起色夢游
地府見大士檢案頭生死冊于中郎先生名
上大著三圈弟以爲其人文今日歐蘇也詩
今日元白也年異日耄耋也官異日倍貳也
未數月而溘然棄人間世始知彭殤何足論
世之黃考鮚背者安知非地府塗抹者哉語
多不悉記大約古之韻士高人已悟大道而
習染未盡者往往多爲陰仙如白蘇輩居海
山及紫府押衙皆陰仙類也中郎其亦然歟

偶于衆念紛擾中忽得寧靜清息頗覺諸念不
生痛快之甚

風雨不能出門端居清坐葺理書藉頗有不全
者甚不快後思老眼不能徧讀隨手抽一冊
聊以送目卽不全亦可

市堤上雷宅空地一區將營菟裘老焉初大人
與兩兄皆居邑長安村中伯脩第後大人始
營一宅于城中石浦河西岸石浦河者穿城
一泓上通江下至蒿港出東河西河兩派久

之江路淤僅存河身水漲時止通東西河萬曆戊寅己卯年間河中猶有舟楫至丙戌丁亥尚可泛兩岸垂楊裊裊自丁亥江水破堤城中漸殘壞然尤可居住故壬辰中郎成進士與伯脩同請告歸伯脩市一居與予一小宅鄰住河西中郎住河東予外王父龔春所公及諸舅俱居河東西朝夕聚首譚禪賦詩爲樂乙未伯脩中郎偕予俱入都江堤日潰大人乃棄石浦居移至斗湖堤上此後骨肉

親戚多凋落伯脩卒于京中郎再請告棄去
浦河居亦治一宅堤上惟予尚居石浦癸卯
予以入都赴鄉試無資斧乃鬻石浦河居而
移眷屬于鄉甲辰下第歸來無居處適中郎
宅後油水之畔有一園名爲小竹林乃予姻
友王官谷名承光讀書處也有竹數萬竿梅
桂柑橘之屬具備竹中列垣牆寘宅宇極精
整官谷韻士排當極有方畧官谷去世此園
轉鬻于王秀才世胤世胤偶有家訟一夜憤

然欲鬻此園中郎一聞急令予成之予亦愛其竹樹乃傾囊并以腴田百畝鬻得遂移眷屬其中中郎易名爲賛管谷以一園皆竹故也丁未予入都不第復歸中郎起銓部是時公安日覺殘破又人情頗不善中郎始有定居江陵沙頭之志托四弟爲市一宅庚戌以驗封郎歸遂脩沙市宅欲完後迎大人娛老其中未及脩成而中郎逝矣初中郎未逝之前數月大人居公安偶有盜警予時方居園

中郎以眷屬居園不安乃以堤上空居令予移住中郎意欲以此居相遺予亦與中郎原不分爾我亦安然居其居矣中郎旣逝予念沙市地繁華非僅予少年輩所安居且不忍不然使其獨居沙頭予乃復退居于園予旣居園于城市路稍迂未免有賓客應酬雖大賓亦必經泥塗糞竇之側乃得至園油河淤塞春雨則泛漲浸徑雖寂寥爲道人分內事然生人以聚爲樂老年不能時時靜坐又不

能終日讀書或賴眼前一二友朋閒譚支日
且相聚之人豈能一一擇其賢不肖舍短取
長皆可供譚消日以此于堤上復寢此居予
之貧窘豈能取之囊中因中郎存日予曾寢
于園乎沙市今以與雲浦得其直以了此局
予多病不能遠遊當少年時意氣如得霜鷹
視東游海上北走大漠如几席前而今年漸
老矣漢有味乎馬少游之言也

王以明先生處出岩爐一商周間物也至法華

菴月江老衲靜坐龕內癯如老鶴惟雙眸炯
炯閒行柏林中

寶方怡山從龍灣市來得雲浦書并金粟園價
卽以完雷氏地價予至二聖寺禪堂看寶方
雲浦來書大約以此地付怡山爲休棲之地
予輩至沙市便住其中怡山作主我輩爲客
予園花木又有主人不至落俗人手亦一快
也

居沙市王遺狂表弟遣人來云尚甫疾已篤謀

棺于予予乃遣人取冬衣質當爲預市棺木
武昌僧知幻來訊衲子世高何在則云已化去
矣世高卽去年從予遊洪山九峰者也年未
滿三十

廬山僧至得石門集石門者廬山一勝槩也遠
法師居廬山三十年凡再至石門有詩及序
謝靈運亦有遊石門詩皆愛其靈境徘徊不
忍去後來游廬山者不知有石門近始有愛
其勝而廬居之者且欲于此結淨侶効遠公

故事大畧以康樂所鑿東林池近日白蓮復開當協遠公再來之懺其志願甚弘明年當往廬山了此願且決向往也

問怡山近日有傳寒灰立化者何也怡山曰乃含輝非寒灰也含輝松江僧亦事達觀久居武林及吳興山中其人孤硬參禪有所悟入後亦能詩晚歲乘舟至嘉興萬壽山中中夜月明登岸讀寺中古碑甫終以身倚碑而化此含輝事也寒灰今在嘉興陳氏庄

晤須水部日華論龍山落帽臺寺曰了無崇阜
巨巒而名重今古若此予曰地固以人重耳
日華見招于庾樓因憶己酉冬水部沈公水壺
見招于此同飲醉醉屈指五年矣水壺卽以
是年轉銓部予問日華水壺近日消息則云
已化去半年矣清心慧質不得四十而卒可
嘆也

十月十五日往龍灣市訪雲浦至郝穴已暮換
一小舟夜宿切口按郝穴舊議開開則江漢

合流其利甚大然穴內地舊捐以予水者今悉成膏腴一開必有泛濫之患故居民憚開予謂荆之江水實爲民害歲議捍蔽年年奔夬夫古以九穴十三口洩水之勢故江勢有所分今諸穴口皆淤矣諸穴口皆淤而止以一郝穴洩之恐三湖兩岸之田廬所傷必甚故不得不議止也

月夜渡三湖湖凡三十里一望無際月下迷路至一阜覓小舟爲導中有蓼臺寺楚王臺榭

多在此中也

晤雲浦息于後園書舍以小舟渡龍湖至湖菴
午登樓見唐伯帰画雪景一幅上題云千山
飛雪白漫漫不獨藍關道路難野衲歸來何
所有担頭挑得萬峯寒

與雲浦論學大約頓悟必須漸脩陽明所云吾
人雖漸悟自心若不隨時用漸脩工夫濁骨
凡胎無由脫化是真實語卓吾諸公一筆抹
殺此等卽是大病痛處蓋此道有所入者只

愁歎了寘之無事甲裏日久月淡熟處愈熟
生處愈生黃魯直云不舍鼻繩牢看水姑此
卽是易簡直捷工夫相與努力而已

登雲浦書樓閱趙子昂泥金書道德經爲刑部
尚書不忽亦公作有子敬并虞伯生跋陳居
中文姬觀獵圖柯九思跋劉松年四皓圖有
薩天錫看雲老人吳全節跋趙文敏小篆千
文有元人汝南任子畫臣及蔡和并本朝商
夫師跋其中四皓圖甚佳

從湖中早發晚抵郝穴登六槳舟歸順風大作
月色晶明抵家已子夜

祈年自郝穴高宅回送其妻父高孝廉寧南名
以勤葬也孝廉少穎異癸卯中鄉試後有失
心病年僅四十四卒孝廉之父名朗舉京兆
孝廉家素豪奢家教甚嚴肅宁南事父極恭
順同父應試都中父呼立床前與之語父已
熟眠猶不敢退或俟至終夜以爲常後遂得
征仲之病宁南蓋歿于孝也

入郡早登舟逆風大作復還過福寧舍同步至
以明宅閒話出古爐一若釜其下有縱橫漏
文元鑄也是日雲浦寄繡大士一軸乃新安
王山人長卿妻所繡也上有蠅頭細書皆繡
成針脚珉絕工甚

雷氏住地者已移去至其處看視小室亦可居
令人汎掃移榻及几案之類住其中修理
玉泉任居士乘舟來乞十方堂碑文

步至青蓮菴遇大西天僧能漢語自本國至中

國途程凡八年曾入京以慈聖太后所賜
千佛衣及金襴袈裟出觀

坐雷氏居王以明來同步至五弟園中臘梅盛
開夜飲于竹籬茅舍

須日華邀遊龍山落帽臺臺舊有亭已久敝日
華新創尚未落成張布幔小飲亭上偕者爲
本郡鄧石田爲廣平二府年五十卽乞歸譚
至日暮始散

早從沙市發舟午抵公安得陶不退書時以侍

其尊人還滇從武林過洞庭止于常德其意
終欲卜居武林故也匆匆發書定明年聚首
之約

僕阿倫病死爲之悲嘆者久之此僕年五六歲
卽供役使長能書歲所抄書無筭從予南北
游最久司出入絕不苟有士君子之行曾遺
至夷陵劉戶部元定問之曰汝從主人遊山
最知山夷陵諸山何如倫曰除却東山餘義
塚耳元定撫掌曰義塚二字最善形容不虛

小脩使也

飯後同蕙畊歸園時梅花爲寒所勒未開入書室偶見廣東蕭少宰玄圃先生親書落花詩四十首于案因持至雷氏宅展玩并納之成帙記萬曆戊申少宰邀予與蘇雲浦侍御欽秦中大宗伯王則之名圖亦來陪玄圃先生出此相示予與雲浦競取爲予所得詩字皆韶秀甚

除夕日歸園度歲親友寥落無可晤言者惟時

向梅花樹下徘徊耳

珂雪堂外集卷之八 終

珂雪堂外集

卷之八

四五